



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**Odluka**  
**o davanju saglasnosti gradonačelnici za zaključenje vansudske nagodbe**  
**(Prijedlog)**

**Predlagač:** Gradonačelnica  
**Obrađivač:** Služba za urbano planiranje,  
investicije, stambene i komunalne poslove

**Sarajevo, januar 2024. godine**

**Adresa:** Hamdije Kreševljakovića 3  
71 000 Sarajevo  
**Tel.:** +387 33 216 659  
**Fax:** +387 33 205 874  
**Email:** [gsgv@sarajevo.ba](mailto:gsgv@sarajevo.ba)  
**Web:** [gradskovijece.sarajevo.ba](http://gradskovijece.sarajevo.ba)



Na osnovu člana 26. i člana 31. stav (1) tačka f) Statuta Grada Sarajevo („Službene novine Kantona Sarajevo“, broj 7/23) i člana 1089. i 1090. Zakona o obligacionim odnosima („Službeni list SFRJ“, br. 29/1978, 39/1985, 45/1989 – Odluka USJ i 57/1989, „Službeni list R BiH“, br. 2/1992, 13/1993 i 13/1994 i „Službene novine FBiH“, br. 29/2003 i 42/2011), Gradsko vijeće Grada Sarajevo, na \_\_. sjednici održanoj dana \_\_. \_\_. 2024. godine, donijelo je

**(Prijedlog)**

**Odluku  
o davanju saglasnosti gradonačelnici za zaključenje vansudske nagodbe**

**Član 1.**

**(Davanje saglasnosti)**

Gradsko vijeće Grada Sarajevo daje saglasnost gradonačelnici Grada Sarajevo da u ime Grada Sarajevo zaključi vansudsku nagodbu između Grada Sarajevo i privrednog društva MN MEDIA COMPANY d.o.o. Sarajevo kojom će se regulirati međusobni odnosi u pogledu sudskog postupka koji se vodi pred Općinskim sudom u Sarajevu u predmetu br. 65 0 Ps 920315 21 Ps između Grada Sarajevo kao tužitelja i privrednog društva MN MEDIA COMPANY d.o.o. Sarajevo kao tuženog, a povodom duga tuženog prema tužitelju u iznosu od 56.272,12 KM.

**Član 2.**

**(Davanje ovlaštenja)**

Gradonačelnica se ovlašćuje da može odmah po stupanju na snagu ove odluke potpisati vansudsku nagodbu sa ovlaštenim licima privrednog društva MN MEDIA COMPANY d.o.o. Sarajevo u formi notarski obrađene isprave.

**Član 3.**

**(Sastavni dio Odluke)**

Sastavi dio ove odluke čini tekst Vansudske nagodbe.

**Član 4.**

**(Stupanje na snagu)**

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Jasmin Ademović**

**Broj:**

**Sarajevo, \_\_. \_\_. 2024. godine**

## O B R A Z L O Ž E N J E

### I PRAVNI OSNOV

Pravni osnov za odnošenje Odluke sadržan je u odredbama člana 1089. i 1090. Zakona o obligacionim odnosima („Službeni list SFRJ“, br. 29/1978, 39/1985, 45/1989 – Odluka USJ i 57/1989, „Službeni list RBiH“, br. 2/1992, 13/1993 i 13/1994 i „Službene novine FBiH“, br. 29/2003 i 42/2011) kojima je propisano slijedeće:

Odredbe člana 1089. Zakona o obligacionim odnosima u stavu (1) propisuju da „*Ugovorom o poravnanju lica između kojih postoji spor ili neizvjesnost o nekom pravnom odnosu, pomoću uzajamnih popuštanja prekidaju spor, odnosno uklanjaju neizvjesnosti i određuju svoja uzajamna prava i obaveze*“, dok stav (2) istog člana propisuju da „*Postoji neizvjesnost i kad je ostvarenje određenog prava nesigurno*“.

Odredbe člana 1090. Zakona o obligacionim odnosima u stavu (1) propisuju da „*Popuštanje se može sastojati, između ostalog, u djelimičnom ili potpunom priznavanju nekog zahtjeva druge strane, ili u odricanju od nekog svog zahtjeva; u uzimanju na sebe neke nove obaveze; u smanjenju kamatne stope; u produženju roka; u pristajanju na djelimične otplate; u davanju prava na odustanicu*“, dok stav (3) istog člana propisuju da „*Kad samo jedna strana popusti drugoj, na primjer, prizna pravo druge strane, to nije poravnanje, te ne podliježe pravilima o poravnanju*“.

Pravni osnov odluke sadržan je u odredbama člana 26. i člana 31. stav (1) tačka f) Statuta Grada Sarajeva.

Odredbe člana 26. Statuta Grada Sarajeva propisuju da „*Gradsko vijeće, kao predstavničko tijelo građana Grada Sarajeva i organ odlučivanja, najviši je organ Grada Sarajeva i odlučuje o svim pitanjima iz članova 17. i 18. ovoga Statuta*“, dok odredbe člana 31. stav (1) tačka f) propisuju da Gradsko Vijeće upravlja i raspolaže imovinom Grada Sarajeva.

### II RAZLOZI ZA DONOŠENJE

Pred Općinskim sudom u Sarajevu u predmetu broj 65 0 Ps 920315 21 Ps vodi se parnični postupak iniciran od strane Pravobranilaštva Grada Sarajeva, u kojem su parnične stranke Grad Sarajeva kao tužitelj i privredno društvo MN MEDIA COMPANY d.o.o. Sarajeva kao tuženi, a sve povodom duga po ispostavljenim fakturama za korištenje priobalnog pojasa rijeke Miljacke, u ukupnom iznosu od 56.272,12 KM. Rješenjem Općinskog suda u Sarajevu od dana 06.06.2023. godine u navedenom predmetu, obustavljen je predmetni parnični postupak radi nastavka istog po pravilima izvršnog postupka. Protiv navedenog Rješenja tuženi je dana 21.06.2023. godine izjavio žalbu, dok je tužitelj dana 10.07.2023. godine izjavio odgovor na žalbu. Trenutno je postupak u fazi rješavanja po žalbi pred Kantonalnim sudom u Sarajevu, a uzimajući u obzir praksu i uobičajenu dužinu trajanja postupaka pred Kantonalnim sudom, ne očekujemo da će isti biti okončan u doglednom periodu.

U predmetnoj pravnoj stvari nije donesena presuda, stoga se može reći da postoji neizvjesnost u pogledu konačnog ishoda sudskog postupka, te prava i obaveza između parničnih stranaka.

U konkretnom slučaju međusobna popuštanja između Grada Sarajeva i privrednog društva MN MEDIA COMPANY d.o.o. Sarajeva, definirana odredbama člana 1089. i 1090. Zakona o obligacionim odnosima se ogledaju u okolnostima da privredno društvo MN MEDIA

COMPANY d.o.o. Sarajevo u cijelosti priznaje tužbeni zahtjev u pogledu glavnog potraživanja, tj. dug prema Gradu Sarajevo prema ispostavljenim fakturama i obavezuje se da isti isplati i prije donošenja sudske presude u pogledu istog, dok se popuštanja Grada Sarajevo ogleda u okolnostima da predloženom nagodbom dozvoljava izmirenje duga u deset (10) mjesečnih rata i odricanju od potraživanja zakonske zatezne kamate. Pri tome je bitno naglasiti da je kamata buduće neizvjesno potraživanje čija osnovanost i visina može biti eventualno poznata tek po donošenju presude i izmirenju glavnog duga.

Također, zaključenjem ove Vansudske nagodbe okončao bi se sudski parnični postupak koji bi, uzimajući u obzir uobičajeno vrijeme trajanja sudskih postupaka pred Općinskim i Kantonalnim sudovima mogao trajati nekoliko godine, a istim bi se doprinijelo ekonomičnosti i efikasnosti postupaka.

### **III OBRAZLOŽENJE ZA DONOŠENJE ODLUKE**

Prijedlog odluke dostavlja se Gradskom vijeću na nadležno razmatranje i odlučivanje, kao organu Grada nadležnom da upravlja i raspoláže imovinom Grada Sarajevo, a radi davanja ovlaštenja gradonačelnici za zaključivanje vansudske nagodbe, budući da je za isto neophodno prethodno usvajanje ove odluke.

### **IV FINANSIJSKA SREDSTVA**

Za realizaciju ove odluke obezbijedena su finansijska sredstva u Budžetu Grada Sarajevo i odnose se za dio troškova za notarske usluge.

1. **GRAD SARAJEVO**, ul. Hamdije Kreševljakovića br. 3., Sarajevo, koga zastupa gradonačelnica Prof. dr. Benjamina Karić, ( u daljem tekstu: Povjerilac)
2. **MN Media Company d.o.o. Sarajevo**, ul. Glođina br. 1., Sarajevo, zastupan po direktorici Dina Lukhodžić, zastupano po Sanelu Neziriću, advokatu iz Sarajeva, ul. La Benevolencija br. 2., (u daljem tekstu: Dužnik)

zaključili su dana \_\_. \_\_. 2024. godine u Sarajevu sljedeću:

## VANSUDSKU NAGODBU

### Član 1.

Strane potpisnice ove Vansudske nagodbe izražavaju svoju zajedničku volju i interes da ovom nagodbom sporazumno regulišu svoja međusobna prava i obaveze, a koja su predmetom spora pred Općinskim sudom u Sarajevu, vrijednost spora 56.272,12 KM, a koji predmet se vodi pod brojem 65 0 Ps 920315 21 Ps.

### Član 2.

Dužnik se obavezuje da će Povjeriocu isplatiti na povjeriočev transakcijski račun br.: 1610000017920082, otvoren kod Raiffeisen Bank d.d., novčani iznos na ime duga u iznosu od :

**56.272,12 KM**

(slovima: pedesetšest hiljada dvjestasedamdesetdvakonvertibilnih maraka i dvanaespfeninga).

Povjerilac ovim putem izjavljuje da oprašta sve utužene zakonske zatezne kamate istaknute u tužbenom zahtjevu prema Dužniku u predmetu broj: 65 0 Ps 920315 21 Ps, te da ista neće potraživati od Tuženog.

Strane potpisnice su saglasne da troškove parničnog postupka u predmetu broj: 65 0 Ps 920315 21 Ps snosi svaka strana zasebno.

### Član 3.

Dužnik će plaćanje iznosa iz člana 2. stav 1. ove Vansudske nagodbe izvršiti u deset jednakih mjesečnih rata, počevši sa plaćanjem prve rate 10 dana od dana zaključenja ovog sporazuma, dok svaka naredna mjesečna rata dospijeva na naplatu svakog 10. dana u mjesecu.

Nakon uplate prve rate ukupnog iznosa člana 2. stav 1. ove Vansudske nagodbe, u vezi sa stavom 1. ovog člana, Povjerilac se obavezuje povući tužbu u predmetu broj: 65 0 Ps 920315 21 Ps kojim se vodi pred Općinskim sudom u Sarajevu, te o istom obavijestiti Dužnika pismenim putem u roku od tri dana od dana povlačenja tužbe.

Po uplati cjelokupnog iznosa član 2. stav 1. ove Vansudske nagodbe, Povjerilac izjavljuje da je u cijelosti namiren po svim osnovama u svojim potraživanjima prema Dužnik iz ovog predmeta, te nakon toga ugovorene strane jedna prema drugoj nemaju daljnjih prava i obaveza.

**Član 4.**

Strane saglasno konstatuju da u slučaju da Dužnik propusti plaćanje dvije uzastopne mjesečne rate, preostali iznos duga dopijeva na naplatu.

**Član 5.**

Strane saglasno konstatuju da ova Vansudska nagodba ima snagu izvršne isprave.

**Član 6.**

Strane su saglasne da je u ovoj Vansudskoj nagodbi izražena njihova prava i stvarna volja, da ista nije zaključena u zabludi ili pod prisilom, te je u znak prihvatanja svojeručno potpisuju.

**Član 7.**

Ova Vansudska nagodba je sačinjena u 4 (slovima: četiri) jednaka primjerka, svaki sa snagom originala, od kojih svaka strana potpisnica zadržava po 2 (slovima: dva) primjerka.

Troškove zaključivanja ove vansudske nagodbe snosi svaka od strana jednako.

**POVJERILAC**

**GRAD SARAJEVO, koga zastupa gradonačelnica Prof. dr. Benjamina Karić**

---

(potpis i pečat)

**DUŽNIK**

**MN Media Company d.o.o. Sarajevo, zastupan po direktorici Dina Lukhodžić**

---

(potpis i pečat)